

Issittoq atominik sakkulianik atuiffiunngitsoq pillugu politikkimik suliniuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inuit Ataqatigiit Inatsisartuni gruppianni ilaasortat)

Akissuteqaat

(Naalakkersuisut Siulittaasuat aamma Nunanut Allanut Naalakkersuisoq)

Siullermeerneqarnera

Issittoq atominik sakkulianik atuiffiunngitsoq qitiutillugu Inuit Ataqatigiit Inatsisartuni gruppianni ilaasortat aalajangiiffigisassatut siunnersuuteqarnerannut qutsavigaavut.

Issittup eqqissisimaffiunissaa qularnaatsuunissaalu Naalakkersuisut isumaqatigivaat. Tamanna qularutigineqanngilluinnassaaq. Nunat tamat Issittoq pillugu soqutiginnikkiartuinnarnerisa nassataannik issittumi pisut sammineqartullu ukkatarineqariartuinnarput. Illersornissamut qullersaqarfiup suliassai, taakkununga ilanngullugu oqartussaaffimminik isumaginnittarnera unammilligassanut nutaanut naleqqussarneqaleruttorput, tassani ilaatigut issittumi naalagaaffinnut allanut tatiginnittuunissaaq taakkuninngalu suleqateqarnissaaq pingaartinneqarpoq.

Issittumi atominik sakkulianik atuisoqarnissaa Naalakkersuisunit isumaqatigineqanngilaq. Pingaaruteqarporli eqqaamassallugu, Naalakkersuisut danskilluunniit naalakkersuisui piginnaatinneqanngimmata periarfissaqaratilluunniit issittumi naalagaaffiit allat namminneq killeqarfimmi iluini sakkussiaatiminnik atomitortunik inissiisinaanerannik killilersuinissamut, assersuutigalugu amerikamiut russillu illersornissamut aqutsisoqarfii sakkutuuilu aqqartartuutiminni sakkut atomitallit usillugit imaani angalasarput.

Januar 2014-imi danskit nunanut allanut ministeriata oqaatigaa, nunanut allanut ministeeriaqarfiup nalilersimagaa Issittup atominik sakkulianik atuiffiunnginnissaannik siunnersuutip atuutsinneqarsinnaanera piviusorsioortuunngitsoq.

Naalakkersuisut Kunneqarfiullu Issittumut isumannaallisaanikkut ingerlatsinissamut isumaat Issittoq pillugu periusissiamit 2011-meersumit aallaaveqarpoq, periusissiami pingaarnertut anguniagaapput aaqqiagiinngissutaasinnaasunik pitsaaliuinissaaq, Issittumi sakkutuulersuussinissap pinngitsoortinniarsarinissaa, aamma Issittup tatigeqatigiinnermik, suleqatigiinnermik tamanullu iluaqutaasussatut peqatigiinnermik malunnaateqartup ataavartinneqarnissaanut suleqataanissaaq.

Taamatut iliorluni Kunneqarfiup tamarmiusup sulissutigaa naalagaaffiit sineriallit, tassaasut Danmark/Kalaallit Nunaat, USA, Canada, Norge Ruslandilu Ilulissani isumaqatigiissut naapertorlugu Issittup Imartaani eqqissisimasumik suleqatigiinnissaat. Isumaqatiginninniarnert aqqutigalugit aaqqiagiinngissutinik aaqqiissuteqarnissamut nunat politikikkut pisussaaffeqarput, tamatuma peqataaffigilluinnarsimavaa Qalasersuarmut siulliuniunneq pillugu oqalunnerit nipangiunneqarnerat, imaluunniit Issittumi allatut peqqarniitsumik pissusilersornerit taamaatinneqarnerat.

Issittumi immikkoortut naalagaaffiit ataasiakkaat oqartussaaffigisaasa ataaniittut Issittumi immikkoortut naalagaaffiit sineriallit inatsisaasigut malittarisassaliunneqarsimapput. Issittoq aamma

inatsisit inuiannut tamanut atuuttut naapertorlugit maleruagassani arlalinni ilaatinneqarpoq, tassunga pingaartumik ilanngullugu Naalagaaffiit Peqatigiit imaani inatsisinik atuutsitsineq pillugu isumaqatigiissutaat 1982-imeersoq, assersuutigalugu umiartornissamut pisinnaatitaaffiit aamma isumalluutininik nakkutilliinermi malittarisassanik peqqissaarluinnartunik imaqartoq.

Taamaammat Naalakkersuisut inassutigaaq siunnersuut itigartinneqassasoq.